



ABDUL KADIR

Pembiakbakaan tambah populasi hidupan liar

DALAM membantu rakyat negara ini menjana pendapatan, Jabatan Perlindungan Hidupan Liar dan Taman Negara (Perhilitan) turut menyediakan permit pembiakbakaan dalam kurungan komersial untuk hidupan liar yang dilindungi.

Ketua Pengarah Perhilitan, Datuk Abdul Kadir Abu Hashim berkata, sekiranya seseorang itu mempunyai permit tersebut, mereka boleh menjual hidupan liar tersebut.

Menurutnya, pemberian permit tersebut adalah merupakan satu inisiatif kerajaan dalam membantu golongan B40 yang mempunyai minat untuk membiak sesuatu hidupan liar.

"Permit ini dikeluarkan untuk pembiakbakaan hidupan liar seperti landak, pelanduk, ayam hutan dan mural batu untuk diniagakan. Bagi pembeli haiwan ini pula, mereka perlu memohon lesen untuk menyimpan hidupan ini daripada Perhilitan.

"Populasi hidupan liar ini semakin menurun. Tujuan utama pembiakbakaan ini dibenarkan adalah untuk menambah populasi hidupan liar ini," katanya ketika dihubungi K2.

Tambahnya, melalui usaha itu juga akan membantu mengurangkan pemburuan hidupan liar tersebut di dalam hutan.

Apabila hidupan liar ini dibiakbakaan orang ramai tidak perlu lagi masuk ke hutan untuk mendapatkannya.

Sebaliknya mereka boleh mendapatkannya daripada mereka yang mengusahakan ladang pembiakbakaan tersebut.

Sementara itu, Abdul Kadir menjelaskan, jika seseorang berhasrat untuk menangkap hidupan liar tersebut di dalam hutan, mereka perlu memohon lesen memburu hidupan liar daripada Perhilitan terlebih dahulu.

"Apabila sudah dapat mereka kemudiannya perlu memohon lesen untuk menyimpan. Begitu juga sekiranya mereka ingin membiak haiwan-haiwan ini, permohonan permit pembiakbakaan juga perlu dikemukakan kepada Perhilitan. Kita juga datang melakukan pemeriksaan kawasan dan menyediakan beberapa syarat sebelum meluluskan sesuatu permohonan," katanya.

Tambahnya, jika hasil pembiakan banyak pihaknya akan meminta mereka membuat sedikit pelepasan hidupan itu ke habitat asal.